

Messadi pertuccont in augment dalla contribuziun dalla vischnaunca 2014 al Museum Regional Surselva

Stimada presidenta

Stimadas parlamentarias, stimai parlamentararis

Il preventiv 2014 cuntegn ina contribuziun dalla vischnaunca al Museum Regional Surselva (MRS) da 36'000 francs. Quella summa corrispunda pli u meins allas contribuziuns precedentas dallas vischnauncas ussa fusiunadas. A caschun dalla deliberaziun dil preventiv 2014 el parlament communal dils 12 da mars 2014 han ins discutau extendidamein davart in augment da quella contribuziun.. Alla finfinala ha la proposta da Valentin Schmid d'alzar la contribuziun sin 60'000 francs tratg la cuorta cun 15:9 vuschs encunter la proposta dalla suprastanza tenor il preventiv. Igl ei denton da lezzas uras vegniu empermess d'examinar danovamein ina damonda respectiva sin la fin digl onn.

Il 24 da november 2014 ha il cassier dil MRS informau il president communal ch'il quen 2014 dil MRS vegni a serrar cun ina sperdita da rodund 56'000 francs. Il saldo cun la fin d'october munti ad in minus da 37'000 francs e per ils davos treis meins seigi da quintar cun in surpli d'expensas da 19'000 francs. Quellas cefras ein documentadas.

La suprastanza communal ha tractau la damonda igl 1. da december 2014 e constatau cun quitaus, ch'ils problems finansials dil MRS ein da liunga vesta. Cun in augment pil 2014 ein ils problems buca da sliagar. Deplorablamein ha l'intervenziun dil MRS, dalla Regiun Surselva e dalla vischnaunca tier il cau dil departement cantunal d'educaziun, da cultura e digl ambient buca giu success. Davart dil cantun ei buca da quintar cun in augment aschi ditg che la nova lescha per la promoziun dalla cultura ei buca en vigur. La suprastanza communal ei perquei dalla ferma perschasiun ch'ils responsabels dil MRS han da procurar per finanzas ulivadas ils proxims onns.

Dalla sperdita demussada settract'ei da 38'000 francs pagas e contribuziuns socialas da conluvre-ras e conluvrers. La suprastanza ei perquei promta da proponer al parlament communal in aug-ment dalla contribuziun da vischnaunca en quei rom a disfavur dil preventiv 2014. El preventiv 2015 sco era pils proxims onns duei la contribuziun tenor l'oppiniun dalla suprastanza communal denton buc vegnir augmentada. Ils responsabels dil MRS ei obligai da tscherchar soluziuns per uli-var las finanzas.

Proposta:

Sebasond allas explicaziuns precedentas propona la suprastanza communal da conceder in cre-dit supplementar el preventiv 2014 tiel conto 3290.3636.00 da 38'000 francs (tochen da cheu 36'000 francs, niev total 74'000 francs) per il Museum Regional Surselva.

Suprastanza communal Ilanz/Glion